

雷波廳志卷三十五

祥異志

書陳洪範推究五行凡厥休咎垂象斯明禹湯盛時
水旱頻薦民不病災德能弭變

聖王在上嘉庥備焉人祥物瑞悉著於篇志祥異第三十五
宋

甯宗嘉定九年東西兩川地大震馬湖夷界山崩八
十里江水不通 通鑑綱目

明

雷波廳志

卷三十五

祥異

一

洪武四年龍馬見于馬湖

宏治十四年馬湖底渦江水白可鑑翌日濁如泔漿
凝兩岸沙石上者如土粉十七日乃澄 通志

國朝

雍正元年全蜀大稔八年夏六月七日五色雲見于
黃螂雷波西光輝四映歷申酉二時 通志

嘉慶五年大飢天姑密鄉民以石粉爲食十一年大
水十五年海腦壩鄉民劉廣順年一百三歲
道光十二年大水十三年六月黑雨損禾稼歲飢竹

生花結實如麥味甘可食十六年龍洞水濁夷匪亂十七年大水十九年大疫二十二年火災焚街房幾徧二十四年復災

同治元年五月五日龍馬見馬湖白色腹下有鱗精彩照耀六年東林鄉多野鹿食禾稼夷匪大亂村落爲墟七年翟朝升妻一產三男劉濟通妻許氏年百歲九年大雨雹

光緒六年龍洞水濁七年東北鄉多豹狀如狗羣聚嗥哭夜入人家搏犬豕或掘死人墓鄉民恐懼持鎗

雷波廳志

卷三十五

祥異

二

銃擊之乃去至秋夷匪亂八年三月馬湖江水涸九年二月龍洞泉水飛激四散歲大熟李懷昌妻曾氏年九十八歲十四年雷震明倫堂裂其柱清海水映日成霞現異彩十五年正月野豹至東門逐犬而食三月牛吃水鄉蓮花石白蛾蔽天數日不散五月夷匪亂十九年二月黃螂火災焚街房五十餘所